

2013-p ingerlanerani paasissutissiissutitut atortussanik suliarinnissuteqarnissamik aammalu paasititsiniutinik paasititsiniaanermik ingerlatsinissamik Naalackersuisut peqquneqarput, taamaasillutik innuttaasut, qimmeqarusullutik kissaateqartut tamakkununga malittarisassat pillugit ilisimatinneqarsinnaaniassammata, kiisalu qanoq qimmimik pitsaanerpaamik sungiusaanissamik isumannaariniaaniissaanut ilisimasaqalernissaat pillugu Inatsisartunut aalajangigassanngorlugu siunnersuut.

(Demokratinit, Inatsisartunut ilaasortaq, Justus Hansen)

Akissuteqaat

(Demokratinit, Inatsisartunut ilaasortaq, Justus Hansen)

Siullermeerut

Aallaqaasiullugu siunnersuummik saqqummiussisup tamatuminnga pingaaruteqangaartumik pineqartumik sammisaqarneranut Naalackersuisut qujassuteqangaarput. Naalackersuisut isumaqatigaat, ajorluartumik qimminik piginnittunik uumasunik sungiusaanissamik suliarinninnissamillunniit, ilisimanninngitsunik ilisimasaqanngitsunillunniit inoqarmat.

Soorlutaaq siunnersuummit saqqummiussisup eqqaagaa, qimminik qimuttunik kiisalu qimminik qimmeqarneq qitsuuteqarnerlu pillugit Inatsisartut inatsisaat assigiinngitsut pigineqarput. www.nanoq.gl – imi qimminik qimuttunik qimmeqartarneq pillugu aviisinut ilanngutassianik annikitsunik kiisalu uumasunik illersuinerlut tunngasutigut uumasunik illersorneqarsinnaasumik suliarinnittarneq pillugu nalinginnaasut. Innuttaasut qarasaasiakkut isaavianni www.sullissivik.gl aammattaaq atugaaqqanik makkuninnga pissarsisoqarsinnaavoq:

1. [Kalaallit qimmiat qimuttoq – qimmiaqqamiit qimmimut qimuttumut](#)
2. [Qimminik qimuttunik nerisitsisarneq](#)
3. [Qimmit qimuttut puallartarnerannik aqutsineq](#)
4. [Uumasunik illersuisarneq pillugu paasissutissat](#)

Naalackersuisut innuttaasut qimmeqartarneq pillugu malittarisassat tamakkununga atuuttut pillugit qaammarsaanissamut paasissutissiissutitut atortussanik suliaqarnissaq pillugu siunnersuut isumaqatigillunnarpaat. Tassungalu atatillugu Naalackersuisut paasititsiniutit pigineqareersut sarniatigut nutaanik suliaqarnerit nutarterniarpaat.

Sullinniakkat tassaassapput qimminik qimuttunik piginnittut, qimminillu piginnittut allat kiisalu meeqqat. Qimminik piginnittut qimmiminnik paarinnillaqqillutillu samminnillaqqittorpasuaqarpoq, kisianni ajorluartumik ingammik qimminik qimuttunik paarinerluisarnerit paarsarlutartarnerillu takukulaarpallaaqaagut. Immikkut ittumik suliniuteqarfiusinnaasut tassaasinnaapput ”meeqqat qimmillu”, tassami Naalackersuisut nalilersuinerat, meearpassuit ingammik qimmeqarfiusuni qimminut ersisartorujussuit, taamaasillunilu inersimasunngornermi nalinginnaasumik qimminut ajortumik eqqarsaasersortarnermut ilaavoq.

Paasititsiniaaneq soorlu aammattaaq siunnersuummik saqqummiussisup allaaserigaa, illuatungeriit attuumassutillit soorlu kommunit, uumasunut nakorsat, politiit qimillillu peqatigiiffii suleqatigalugit ingerlanneqartariaqaraluarpoq.

Paasititsiniariaatsit aallaavigissavaat atuagaaqqat/allagartat kiisalu nittartakkatigut paasititsiniutit assigiinngitsut. Atuagaaqqat kommunini, atuarfinni suliffeqarfinnilu anginerusuni pissarsiarineqarsinnaasaariaqaraluarput kiisalu immikkut pisoqartillugu soorlu qimussimik sukkanni-uuttoqartillugu agguarneqartarlutik.

Immikkut ittumik suliniuteqarfiusumut tunngasoq ”meeqqat qimillu” nuna tamakkerlugu atuarfinni aallaavilerneqarsinnaavoq (klassit qaffasissusianni mikinerit), tassanilu ilinniartitsisut taassuminnga sammisassamik ilinniartullu eqqartuisarsinnaagaluarput. Naalakkersuisut paasissutissiisutitut atortussatigut ikiorsiiniarput kiisalu ajornangippat ornigullutik, takusaallutik pineqartut pillugit paasiniatitsisinnaallutilluunniit.

Paasititsiniaanermut saniatigut aningaasaliissutinik illikartitsisoqassanngimmat, taamaammat paasissutissiissutitut atortussanik filminik tv-kullu takutitassanik akisunerusunik suliarinninnissaminut Naalakkersuisut periarfissaqassanngillat. Aammattaaq isumalluutinik piumasaqaatitalinnik atortussanik pioreersunik ineriartortitseqqissinnaaneq naatsorsuutigineqarsinnaanngilaq.

Tamakkuninnga oqaasertalerlugu Naalakkersuisut siunnersuut akuerisassanngorlugu inassutigaat.